

**Uunga siunnersuut: Ilinniartut sungiusartullu atorfinitinnerini suliffiit pisortanilu oqartussat inuiqaqtigia inni akisussaaffeqarnerat pillugu Inatsisartut inatsisaat nr. xx, xx. xxx 2019-imeersoq**

## Kapitali 1

### *Atuuffia*

**§ 1.** Inatsisartut inatsisaat atortinneqassaaq pisortanut imaluunniit suliffeqarfimmut, pisortat imaluunniit suliffeqarfik sulisoqarpat ingerlatamik ingerlatanilluunniit tulliuttuniittut ilaannik:

- 1) Kalaallit Nunaata nunataani ingerlatani, tak. taamaattoq imm. 2.
- 2) Kalaallit Nunaata imartaani ingerlatani, tak. taamaattoq imm. 2.
- 3) ingerlatani immikkut Kalaallit Nunaanni aningaasarsiorermik killeqarfip iluani ingerlatsiviusuni Namminersorlutik Oqartussat oqartussaaffigisaanni, tak. taamaattoq imm. 2.
- 4) ingerlatani Kalaallit Nunaata nunataata toqqaviani suliaasuni, Namminersorlutik Oqartussat oqartussaaffigisaannut ilaasumi, tak. taamaattoq imm. 2.

*Imm. 2.* Inatsisartut inatsisaat taamaallaat atortinneqassaaq pisortanut imaluunniit suliffeqarfinnut sulisoqartnunut ingerlatanik imm. 1-imi eqqaaneqartunik, suliani ima annertussuseqartuni ataatsimut minnerpaamik ullorsiutit ukiuanni qaammatinik 3-nik sivisussuseqartunik.

*Imm. 3.* Naalakkersuisut ersarinnerusunik aalajangersagaliorsinnaapput Inatsisartut inatsisaata atuuffissaanut imm. 1 aamma 2 naapertorlugit, tamatumani lu aamma makkununnga:

- 1) Taaguut ingerlatani imm. 1, nr.1-4-imi.
- 2) Taaguut “Namminersorlutik Oqartussat oqartussaaffigisaanni” imm. 1, nr. 3 aamma 4-mi.
- 3) Piffissamik naatsorsuisarneq imm. 2 naapertorlugu, sulisup ingerlatamik ingerlatanilluunniit arlalinnik imm. 1, nr.1-4-mi pineqartunik ingerlatsineranut.

**§ 2.** Inatsisartut inatsisaat atortinneqassanngilaq eqqartuussivinnut aamma Kalaallit Nunaanni danskit naalagaaffiata oqartussaasuini.

### *Nassuaatit*

**§ 3.** Oqartussat Inatsisartut inatsisaat naapertorlugu tassaapput pisortaqarfiiit, pisortat ataatsimoortut, ingerlatsiviit allatulluunniit ataatsimoortut pisortat ingerlatsiviinut atasuusut, imaluunniit allatut pisortasut imaluunniit pisortanit pigineqartut imaluunniit nakkutigineqartut, aammalu Kalaallit Nunaanni ingerlatanik suliaqartunik sulisoqartut.

**§ 4.** Suliffeqarfittut Inatsisartut inatsisaat naapertorlugu paasineqassaaq suliffeqarfik namminersortoq imaluunniit pisortat suliffiutaat sunaluunniit, Kalaallit Nunaanni angerlarsimaffeqartoq.

**§ 5.** Sulisutut Inatsisartut inatsisaat naapertorlugu paasineqassaaq inuk kinaluunniit, pisortanit atorfinititsitaasoq, tak. § 3, imaluunniit suliffeqarfimmit, tak. § 4, Kalaallit Nunaannilu sulianik ingerlatsisoq. Sulisuusutut isigineqassaaq kinaluunniit inuk, inuk taanna Kalaallit Nunaanni akileraartussaappat akileraartussaappat suliaqartinneqartoq.

*Imm. 2.* Sulisutut suliamik ilinniarsimasutut paasineqassaaq Inatsisartut inatsisaat naapertorlugu inuk kinaluunniit inuussutissarsiutinut ilinniartitaanerni ilinniakkamik naammassisqarsimasoq, ISCED 2011-ip 3-4 nalinganik pisortani imaluunniit suliffeqarfimmi suliffeqartoq, ilinniakkamullu naapertuutunik suliaqartinneqartoq.

**§ 6.** Najugaqavisoq Inatsisartut inatsisaanni ima paasineqassaaq, inuk Kalaallit Nunaanni aalajangersimasumik najugaqartoq.

*Imm. 2.* Naalakkersuisut imm. 1-imi najugaqavisoq taaguut qanoq paasineqassanersoq aalajangersakkanik erseqqinnerusunik aalajangersaasinnaapput.

**§ 7.** Ilinniartutut imaluunniit sungiusartutut Inatsisartut inatsisaat naapertorlugu paasineqassaaq kinaluunniit inuk akuerisaasumik ilinniakkamik ingerlataqartoq, taamaalillunilu tassunga atatillugu ilinniartutut imaluunniit sungiusartutut suliamik ingerlataqartussaq.

## Kapitali 2

**§ 8.** Pisortat imaluunniit suliffiit kikkulluunniit suliamik ilinniarsimasumik ataatsimik arlalinnilluunniit sulisoqartut pisussaapput ilinniarfinnut susassaqtunut saaffiginninnissamut ilinniarfisanut imaluunniit sungiusarfissatut akuerineqarumallutik.

*Imm. 2.* Oqartussap imaluunniit suliffeqarfip ingerlanera imaluunniit ingerlataasa annertussusaat allanngorpat, oqartussaq imaluunniit suliffeqarfik ilinniartoqarfissatut imaluunniit sungiusartoqarfissatut nalilersorteqqinniarluni ilinniarfinnut attuumassuteqartunut attaveqassaaq.

*Imm. 3.* Naalakkersuisut ersarinnerusunik aalajangersagaliorsinnaapput pisortat aamma suliffiit imm. 1-imi pisussaaffiisa naammassineqartarnissaat pillugit.

**§ 9.** Oqartussat imaluunniit suliffeqarfik ilinniagaqarsimasunik ataatsimik arlalinnilluunniit sulisoqartoq, taanna § 8 naapertorlugu ilinniartunut imaluunniit sungiusartunut inissaqartitsisussatut akuerineqarsimaguni, ilinniartunik sungiusartunillu najugaqavissunik atorfinititsinissamik pisussaaffeqarpoq.

*Nalunaarsuisarneq*

**§ 10.** Pisortaqarfait imaluunniit suliffiit kikkulluunniit suliamik ilinniarsimasumik ataatsimik amerlanernilluunniit sulisoqartut, ilinniartitaanermi ilinniagassat aamma distriktit assigiinngitsut iluanni qassnik ilinniartoqarnissamut imaluunniit sungiusartoqarnissamut akuerisaanerlutik Naalakkersuisut suliffissanut nittartagaanni nalunaarsuissepput.

*Imm. 2.* Imm. 1 naapertorlugu pisussaaffeqarneq makkuninnga ilusilimmik naammassineqarsinnaavoq:

- 1) Naalakkersuisut suliffissanut nittartagaanni elektroniskimik immersugassamik immersuinikkut imaluunniit
- 2) immersugassap immersornissaanut ikioqqulluni ilinniarfennik attuumassuteqartunik attaveqarnikkut.

*Imm. 3.* Elektroniskimik immersugassaq oqartussanit attuumassuteqartunit akuerineqarsimassaaq aammalu siunertamut atorneqartussaasoq erseqqisumik allassimassalluni.

*Imm. 4.* Nalunaarsuineq ukioq naatinnagu ukiut tamaasa pissaaq, taamaattoq takuuk § 16, imm. 2, taamaalilluni ilinniarfissat imaluunniit sungiusarfissat najugaqavissut ilinniarnissamik qinnuteqartut akornanni ujartuinissamut naatsorsuutigineqartumut naapertuunnissaat pitsaanerpaamik qulakkeerneqassalluni. Nalunaarsuinerit Naalakkersuisut suliffissanut nittartagaanni tamanit pissarsiarineqarsinnaassapput.

*Imm. 5.* Nalunaarsuineq aamma paasissutissanik nalunaarsukkanik ingerlatitseqqinneaq, takuuk imm. 1, Naatsorsueqqissaartarfimmut tulluarsarneqassaaq.

*Imm. 6.* Naalakkersuisut ersarinnerusunik aalajangersagaliorsinnaapput periaasissanut, paasissutissanut aamma ilinniarfissanik aamma sungiusarfissanik upternarsaasikkanik nalunaarsuisarnerit pillugit.

### *Pisussaaffinnik naammassinnittoqanngippat*

**§ 11.** Oqartussat imaluunniit suliffeqarfiup ilinniartoqartussatut imaluunniit sungiusartoqartussatut akuerineqarsimasup, aammalu qaammatisiutit malillugit ukumi § 9 malillugu ilinniartunik imaluunniit sungiusartussanik najugaqavissunik atorfinitssinissamut pisussaaffiminik naammassinnissimannngitsup, pisussaaffiup naammassisimanninneranut pissutaasoq nassuiassavaa.

*Imm. 2.* Pisussaaffimmik naammassinnissimannnginnermut nassuaatissaq, tak. § 9, nassuaataani ilinniartunut imaluunniit sungiusartussanut oqartussap imaluunniit suliffeqarfiup qaammatisiutit malillugit ukumi atorfinitssitassaraluinut, kisianni atorfinitssissimannngisaannut, ataasiakkaanut tamaginnut ilinniartitaanermi suliassaqarfik aamma distrikti ilaatinneqassapput.

*Imm. 3.* Pisussaaffimmik naammassinnissimannnginnermut nassuaatissaq, tak. § 9, pisortanit imaluunniit suliffimmit immersorneqassaaq Naalakkersuisut suliffissanut quppersagaanni, siunertamut tamatumunnga atugassiami.

*Imm. 4.* Pisortat imaluunniit suliffiup pisussaaffiminik naammassinnissinnaanginneranut

nassuaatissaq, tak. § 9, Naalakkersuisut quppersaanni tamanut takusassiarineqassapput.

*Imm. 5.* Naalakkersuisut kisitsisinik paasissutissanik suliaqartassapput nalunaarusiortarlutillu pisariaqassusia naapertorlugu ukiumoortumik suliffeqarneq pillugu nassuaasiaminni.

*Imm. 6.* Naalakkersuisut aalajangersagaliorsinnaapput tamanit takuneqarsinnaasussamut smiley-imik aaqqissuussinermut pisortanut aamma suliffinnut inuiaqatigiinni ilinniartoqarnissamut aamma sungiusaammik sulisoqarnissamut akisussaaffeqarnermut atatillugu.

*Imm. 7.* Naalakkersuisut §11. imm. 1 naapertorlugu oqartussat suliffeqarfilla pisussaaffimmik naammassinnissimannnginnermut pissutaasunik qanoq nassuaanerisa imarisassai ilusissaallu pilligit aalajangersakkanik erseqqinnerusunik aalajangersaasinnaapput.

*Atorfinitassarsiorneq*

**§ 12.** Pisortat oqartussaasut aamma suliffiit tamanut takusassiissapput atorfimmik imaluunniit atorfinnik arlaqartunik inuttassarsiuunneqartunik Naalakkersuisut suliffisanut quppersagaanni, aammalu pisariaqartunik naleqquettunillu allanik iliuuseqassallutik ilinniartunik aamma sungiusartunik atorfinitssinissaq siunertaralugu.

*Imm. 2.* Atorfimmik inuttassarsiuussamik imm. 1 apeqqutaatinnagu tamanut saqqummiussineq pisassaaq saqqummiussinissanut naleqquunnerpaani, qinnuteqarnissamut soqtiginnissinnaasunut tunngatillugu.

*Imm. 3.* Allagarsiilluni inuttassarsiuineq tamanut naleqquettumi minnerpaamik qaammammi 1-imi takusassiarineqassaaq.

*Imm. 4.* Pisortat imaluunniit suliffeqarfik pisussaaffeqartoq tamanut ammasumik allagarsiinissamik naammassinnittariaqanngilaq, pisortat imaluunniit suliffeqarfik ilinniartunik imaluunniit sungiusartunik sulisitsinermigut pisussaaffimminik naammassinnereersimappat.

*Imm. 5.* Naalakkersuisut Naalakkersuisut suliffisanut nittartagaanni atorfimmik allagarsiissummik tamanut saqqummersitsisarneq pillugu aalajangersakkanik erseqqinnerusunik aalajangersaasinnaapput.

**§ 13.** Inuit, tak. § 6, ilinniartitaanermi aallartinnissamut piumasaqaatalimmik akuerineqarsimasut, ilinniartitaanerup ilaatut ilinniartuulluni imaluunniit sungiusarluni sulinissaq ilaalluni, aammalu ilinniartunut imaluunniit sungiusartunut inissaq pillugu isumaqatigiissuteqarsimannngitsut, Naalakkersuisut suliffisanut nittartagaanni CV immersussavaat.

*Imm. 2.* Suliffisanut, ilitsersuisarnernut pikkorissaqqinnernullu qitiusumik ingerlatsiviit imm. 1 naapertorlugu inunnut tamatumunnga ilitsersuisinnaapput.

*Imm. 3.* Naalakkersuisut suliffisanut nittartagaanni CV immersornissaanut pisussaaffeqarneq pillugu aalajangersakkanik erseqqinnerusunik Naalakkersuisut aalajangersaasinnaapput.

## *Nakkutilliineq*

**§ 14.** Naalakkersuisut nakkutilliisuupput aalajangiisarlutillu pissutsini Inatsisartut inatsisaanni pineqartuni tamani, tamatumani aamma aalajangersakkanut Inatsisartut inatsisaannik tunngaveqartumik pilersinneqartunut.

*Imm. 2.* Naalakkersuisut pisortatut suliamik ingerlatsinerup ilaatut Inatsisartut inatsisaat naapertorlugu paassisutissat pisariaqartut inunnut tunngasut suliarisinnaavaat peqqusinnaallugillu pisortat kikkulluunniit suliffeqarfiillu Inatsisartut inatsisaanni pineqartut.

## **Kapitali 3**

### *Nalilersueqqinneq*

**§ 15.** Pissutsit Inatsisartut inatsisaanni § 14-imni pineqartunut ilaasut pillugit aalajangererit Naalakkersuisunut suliap nalilersoqqinnissaa qinnutigalugu saqqummiunneqarsinnaapput.

*Imm. 2.* Aalajangigaq suliassanngortinnejarsinnaavoq nalilersoqqinnejarnissaa siunnerfigalugu imm. 1 naapertorlugu, ukunannga:

- 1) Suliami peqataasumit.
- 2) Sulianut tunngasumik peqatigiiffiit kattuffiillu sulinermik inuussutissarsiutilinnut aamma sulisitsisunut sammisut Kalaallit Nunaanni angerlarsimaffilit, malittarisassatik naapertorlugit najugaqvissut suliffeqarnerannut aamma ilinniartitaanerannut pingaarnertut soqtigisaqartut.

*Imm. 3.* Imm. 1 malillugu aalajangiussinermik nalilersueqqinnissaq pillugu qinnuteqaatip saqqummiunnera allaganngorlugu pissaaq.

*Imm. 4.* Aalajangikkamik nalilersueqqinnissaq pillugu qinnuteqaammik saqqummiussinermut piffissaliussaq tassaavoq ullormit aalajangiussap peqataasumut nalunaarutigineranit sapaatit akunneri 4-at.

*Imm. 5.* Naalakkersuisut erseqqinnerusunik aalajangersagaliorsinnaapput nalilersueqqinneq pillugu.

## **Kapitali 4**

### *Atortuulersitsineq aamma ikaarsaarnermut aalajangersakkat*

**§ 16.** Inatsisartut inatsisaat atortuulerpoq 1. januar 2020.

*Imm. 2.* Naalakkersuisut ersarinnerusunik aalajangersagaliorsinnaapput, tak. § 10, imm. 4, 2020-imut piffissaq nalunaarsuiffiusussaqtuq pillugu.

*Namminersorlutik Oqartussat, ulloq xx. xxxx 2019*

Kim Kielsen